

EHUko langileria erregularizatze HKEEren laguntza eskatu du Larreak

Arazo hau behin-betiko konpondu beharra aldarrikatu du kontseiluburuak

Herri Kontuen Euskal Epaitegiak EHUri irakasleria eta aurrekontu kudeaketa erregularizatzen lagundu beharko liokeela uste du Pedro Larreak, Gizarte Kontseiluko buruak. EHUn «kutxa beltza» den langile gastuen atala behin-betiko konpondu beharra aldarrikatu zuen atzo Larreak.

GORANE AGIRRE / BILBO

Euskal Herriko Unibertsitateko (EHU) Gizarte Kontseiluko lehendakariak «positibotzat» jo zuen Inaxio Oliveri Hezkuntza sailburuak eta Juan Jose Ibarretxe lehendakariorde eta Hazien da buruak Unibertsitatearekin hitzartutako akordioa. Hots, langile gastuei aurre egiteko EHUn dirulaguntza handitzea eta horren truke irakasle taldea erregularizatzea.

Akordio honen arabera, Eusko Jaurlaritzako Hezkuntza Sailak 1.800 milioi pezeta (72 milioi libera inguru) handituko du EHUri bideratuko dion dirulaguntza.


Unibertsitateak baldintza hori betetzeko, berak ere «tentsio finantzieroa» mantenduko lukeela esan zuen Larreak. Izan ere, bere ustez, «aukera ezin hobia da EHUK bere irakasleria behin-betiko antola dezan. Langile gastuen atala izan ezik, legea betetzea ez dago horren gaizki EHUn. Horregatik, behin-betiko argitu behar dugu kutxa beltz hau».

Herri Kontuen Euskal Epaitegiak (HKEE) EHUri irakasleria eta aurrekontu kudeaketa erregularizatzen lagundu beharko liokeela adierazi zuen Kontseiluko buruak. Bere hitzetan, «HKEE aurrezaintza lanak ere egin beharko lituzke, ahulezia nabariak dituzten instituzioei lagunduz hurrengo fiskalizatze txostenean ager ez daitezen».

Larrearentzat «desiragarria» litzateke HKEE Unibertsitatearen egoeraren diagnostikoa egitea. Hau da, EHUn kudeaketaren auditoria egitea, zentroz zentro eta sailez sail irakasle kopurua, ematen dituzten klase orduak, plantila eskasa edo neurritz kanpokoa den eta abar ezagutzeko.

Lan hau egiteko erakunde egokiena HKEE dela iritzi du Pedro Larrea Gizarte Kontseiluko lehendakariak horretarako beharrezko baliabideak dituelako.

EHUn gaur egungo lehenetasunak, Larrearentzat, finantzaketa irizpideak finkatzea eta



EHUK finantzaketa irizpideak finkatu behar dituela uste du Larreak.

XOUSE SIMAL

Unibertsitate Antolaketa Lege Proiektua jorratzea dira. Azken puntu honi dagokionez, Kontseiluko buruaren arabera, «busti egin behar dugu» eta oinarri batzuk zehaztu behar dira fakultateen bikoizketaren inguruan erabakiak hartu aurretik.

Ildo honetan, Bizkaiko kanpusean Zuzenbide fakultate bat

zabaltzearen gaia Gizarte Kontseiluak maiatzean egingo duen osoko bilkuran aztertuko dela iragarri zuen.

Bestalde, Gizarte Kontseiluak elebitasunari buruzko azterketa bat egiteko agindu dio IKEI enpresari. Azterketa honen helburua, Larrearen esanetan, arazoa kokatzea eta hurrengo hamar ur-

teetako garapena ezagutzea dira. Unibertsitateak hartu behar dituen erabakiak zuzenak izan daitezen ezinbesteko lantresna da hau Larrearen ustez. Azterketak, besteak beste, irakaskuntza ereduaren arabera ikasleen jatorria eta benetako matrikula datuak landuko ditu eta 7,5 milioi pezetako aurrekontua du.

EHU eta NUPen arteko lankidetzarako hitzarmena gutxi barru sinatuko da

IRUÑEA

Orain dela aste batzuk Zaragoza eta Errioxako unibertsitateekin egin zuten bezala, Nafarroako Unibertsitate Publikoak (NUP) lankidetzarako hitzarmena sinatuko du gutxi barru Euskal Herriko Unibertsitatearekin (EHU). Hitzarmenean zenbait arlotan elkarrekin lan egiteko prest dudelaz azaltzen da, ikerkuntzan, hezkuntzan, argitalpenetan, eta normalizazio linguistikoan, besteak beste.

Hala ere, bi unibertsitateen arteko distritu bateratua sortzea «ezinezkoa» dela azaldu dute NUPeko zenbait kidek, «legeak komunitate bakoitzean distritu bakarra izan behar duela baitio». Alde honetatik hitzarmenak aipatzen du «bi zentroen arteko ikasleen mugikortasuna bultzatuko dela. Ildo honetan, bi unibertsitateen arteko distritu bateratua sortzeko aukera aztertuko da, horretarako onartuko diren

neurriekin». Hau, ordea, ez da posible izango epe laburrean eta, gainera, Zaragoza eta Errioxako unibertsitateekin sinaturiko hitzarmenean ere gauza bera aipatzen zen, orain arte deus egin ez bada ere.

EHU-N BIHAR AZTERGAI Hitzarmena ez da oraindik sinatu, NUPeko Gobernu Batzarrek biharko bilean aztertuko baitu. Ziurrenik arazorik gabe sinatuko da, bestetan gertatu den bezala. Hitzarmenak dioenaren arabera, bi zentroen artean Batzorde Iraunkorra eratuko da aipatutako lankidetzarako bultzatuko eta segimendua egiteko. Akordioa sinatu eta gero bi komunitateetako gobernuetan aurkeztuko dute, partehartzea eta laguntzak eskatzeko. Ondoren, bi unibertsitateko kontseilu sozialetan ere aurkeztuko dute hitzarmena, beren partehartzea eta konprometuzua lortzeko.

Euskal Herriko Unibertsitate-

ko (EHU) Gobernu Batzordeak bihar goizean egingo duen bileran aztertuko du unibertsitate gaitan elkarlanean aritzeko hitzarmena. Unibertsitateko iturrien arabera, hitzarmenak batzordekideen oniritzia izango du ziur aski.

Pedro Larrea EHUko Gizarte Kontseiluko lehendakariak ez zuen gai honi buruzko baloraziorik egin nahi izan, gogoetarik ez duela egin argudiatuta. Hala ere, «positibotzat» jo zuen bi unibertsitateen arteko edonolako hurbilketa prozesua garatzea.

Larreak adierazi zuenez, «EHUK desegituraketa arazo larria du, baita eredu eta irizpide gabezia ere. Ikuspegi instituzionaletik EHUK ez du heldutasunik prozesu instituzional zailagoak planteatzeko». Hala ere, ez du «horren gaizki» ikusten unibertsitate bakar batean bateratzea, nahiz eta horretarako «denbora» behar dela nabarmendu zuen.

Kontsentsurako deiarekin hasi da klimari buruzko konferentzia

DONOSTIA

Kontsentsua eta hainbat neurri hartzeko akordioa eskatuz hasi zuen atzo Angela Merkel Alemaniako Ekologia ministroak, egunotan Berlinen egingo den Nazio Batuen Erakundearen (NBE) Klima Aldaketari buruzko Konferentzia. Edonola ere, itxaropen gutxi sortu da orain arteko konferentziak ekar ditzakeen ondorio eta neurri zehatzen inguruan. Izan ere, klima aldaketaren eraginez ingurugiroan sor daitezkeen kalteak saihesteko proposamenek ezadostasun nabaria piztu dute herrialdeen artean.

Angela Merkelek (bera hautatu dute konferentziako lehendakari), ordea, ez zuen etsi adostasunaren aldeko mezua bota gabe, eta klima aldaketarekin munduko herrialde guztien arazoa dela nabarmendu zuen: «Karbono dioxido isurketak murrizteko akordioa lortu beharko genuke, edo gutxienez, gai horren inguruko nazioarteko protokolo bat erdies- teko eztabaida suspertu». Halaber, herrialde behartsuenetako kutsadura gutxitzeko, Ipar eta Hegoaren arteko elkarlanaren irizpideetan konprometuz bat lortu beharko litzatekeela azpimarratu zuen.

Konferentzian sarrien erabiliko duten gaietako bat Lurraren berotzea da. Izan ere, adituek jakinarazi dutenez, egungo joerari segituz bi edo hiru gradu altuagoa izango da Lurraren batez besteko tenperatura, eta beroketaren ondorioak «katastrofikoak» izango ei dira; besteak beste, itsasoa haztea (hainbat lur zati azpian hartuz) eta hainbat lurralde desertizatzea.

Arazoari irtenbidea emateko hartu beharreko neurrietako bat, herrialde industrializatuek CO2 isurketak 2005era bitartean % 25 gutxitzea da, baina hainbat estatuk dagoeneko iragarri dute ez daudela horretarako prest. Talde ekologistetakordezkariak eta 31 irla biltzen dituen AOSIS elkar- tea, ordea, horren alde borrokatuko dira.

Nazio Batutek Berlinen antolatutako konferentzian, 130 estatutako milaren bat ordezkari ari dira parte hartzen.